

ADRODDIAD I'R:	Pwyllgor Trwyddedu
DYDDIAD:	22 Mehefin 2022
SWYDDOG ARWEINIOL:	Pennaeth Cynllunio, Gwarchod y Cyhoedd a Gwasanaethau Cefn Gwlad
SWYDDOG CYSWLLT:	Rheolwr Busnes Gwarchod y Cyhoedd trwyddedu@sirddinbych.gov.uk 01824 706066
PWNC:	Newidiadau Arfaethedig i Dabl Ffioedd a Phrisiau Cerbydau Hacni

1.0 DIBEN YR ADRODDIAD

1.1 Adolygu'r prisiau tariff cyfredol ar gyfer cerbydau hacni (taxis).

2.0 CRYNODEB GWEITHREDOL

2.1 Yn dilyn cais gan nifer o yrwyr trwyddedig i adolygu'r prisiau tariff cyfredol, mae swyddogion wedi drafftio cynigion i ymgynghori arnyn nhw.

3.0 PŴER I WNEUD Y PENDERFYNIAD

3.1 Deddf Llywodraeth Leol (Darpariaethau Amrywiol) 1976.

4.0 GWYBODAETH GEFNDIR

4.1 Mae Adran 65 Deddf Llywodraeth Leol (Darpariaethau Amrywiol) 1976 ("y Ddeddf") yn caniatáu i'r Cyngor osod cyfraddau neu ffioedd o fewn y sir mewn perthynas â llogi cerbyd.

4.2 Ystyriodd yr Aelodau adroddiad yng nghyfarfod diwethaf y Pwyllgor Trwyddedu a phenderfynwyd y dylai Swyddogion ymgynghori ar y cynigion y cytunwyd arnynt ac adrodd yn ôl i'r Pwyllgor Trwyddedu os oedd gwrthwynebiadau.

4.3 Yn dilyn penderfyniad dirprwyedig gan yr Aelod Arweiniol, cyhoeddodd y swyddogion yr hysbysiad statudol yn y wasg leol, fel y mae yn Atodiad A.

4.4 O ganlyniad i'r atodiad hwnnw, cyflwynwyd pedwar ar ddeg o wrthwynebiadau o fewn y cyfnod angenrheidiol o 14 diwrnod. Mae crynodeb o'r gwrthwynebiadau hynny wedi'i olygu ac ar gael yn Atodiad B.

- 4.5 Dywedodd y swyddogion wrth bob gyrrwr trwyddedig na fyddai'r newid arfaethedig i'r tariff yn cael ei wneud nes byddai'r Aelodau wedi ystyried y gwrthwynebiadau. O ganlyniad, derbyniwyd nifer o sylwadau yn cefnogi'r newidiadau arfaethedig i'r tariff ac mae'r rhain wedi'u hatodi fel Atodiad C. Cafwyd dwy ddeiseb hefyd, wedi'u llofnodi gan 38 o yrwyr trwyddedig.
- 4.6 Mae'r tariff arfaethedig wedi'i atodi yn Atodiad D ac mae'r newidiadau sy'n cael eu cynnig wedi'u hamlygu.

5.0 YSTYRIAETHAU

- 5.1 Cafodd y "tabl ffioedd" ei newid ddiwethaf yn 2018.
- 5.2 Mae'r prisiau am bellter yn cael eu defnyddio i greu "tabl cynghrair" o brisiau tacsï ledled y DU, sy'n cael ei greu gan y *Private Hire and Taxi Monthly*. Ar sail y prisiau cyfredol (£5.60), mae Sir Ddinbych yn rhif 268 o gyfanswm o 359 o Awdurdodau Lleol ledled y DU; rhif 13 o 22 yng Nghymru a rhif 5 o 6 yng Ngogledd Cymru (Mai 2022). Efallai y bydd yr Aelodau'n dymuno nodi y bydd y cynnig hwn yn rhoi Sir Ddinbych yn y 7^{fed} safle uchaf yng Nghymru ac, ar y cyd â Gwynedd, yr 2^{il} uchaf yng Ngogledd Cymru, gyda'r un daith yn costio £6.00. Conwy sydd â'r pris uchaf yn y rhanbarth ar ôl newid eu prisiau yn ddiweddar, sef £6.60.
- 5.3 Mae'r cymariaethau'n seiliedig ar daith o ddwy filltir ar y tariff arferol ("Tariff 1") ac nid yw'n cynnwys unrhyw ychwanegion. Safle "1" yw'r drutaf.
- 5.4 Mae'r cynigion yn golygu cynnydd o 7% am daith o ddwy filltir, er bod y ganran hon yn cynyddu wrth deithio ymhellach.
- 5.5 Bydd yr Aelodau'n dymuno ystyried barn gwrthwynebwyr a chefnogwyr i'r cynnig wrth benderfynu a oes angen newid y tariff ac, yn benodol, efallai y byddent yn ystyried agweddau fel:
- Amseriad tariff 2
 - Y diwrnodau lle mae tariff 2 yn cael ei ddefnyddio
 - A yw'r gyfradd fesul milltir yn fesur priodol am bellter ychwanegol? A yw fesul hanner milltir yn well?
- 5.6 Ar ôl ystyried y gwrthwynebiadau, mae'n rhaid i'r Cyngor osod dyddiad cyflwyno i'r tariff, gyda neu heb unrhyw newidiadau, ac mae'n rhaid i'r dyddiad hwn fod o fewn dau fis i'r dyddiad sydd wedi'i nodi yn yr hysbysiad y cyfeirir ato ym mharagraff 4.3. Er eglurder, dyddiad cyflwyno'r hysbysiad cyhoeddus oedd 11 Mai 2022 ac felly ni all y dyddiad cyflwyno fod y tu hwnt i 10 Gorffennaf 2022.

5.7 Dylai'r Aelodau nodi, er bod y Cyngor yn gosod y tabl prisiau, y gall perchennog cerbyd hacni godi llai o bris ar gwsmer; y pris sydd wedi'i osod yw'r uchafswm a ganiateir.

6.0 ARGYMHELLIAD

6.1 Bod yr Aelodau'n ystyried yr holl sylwadau a dderbyniwyd, o blaid ac yn erbyn y cynigion ac yna'n penderfynu un ai:

- Cymeradwyo'r tariff arfaethedig fel mae wedi'i nodi yn Atodiad D gyda dyddiad cyflwyno ar 1 Gorffennaf 2022, neu
- Newid y tariff arfaethedig gyda dyddiad cyflwyno ar 1 Gorffennaf 2022, neu
- Wrthod y cynigion